

# Oz è il Di mundial dal teater



Uffizi federal da cultura UFC

Schweizerische Eidgenossenschaft  
Confédération suisse  
Confederazione Svizzera  
Confederaziun svizra



text: Chattrina Josty, illustraziun: Yvonne Giènal,  
grafica: Theres Jönger  
© Lia Rumantscha

**KIDSFITSCHE**  
Lia Rumantscha

# Il Di mundial dal teater

Has ti era già udì la frasa: «Chala da far teater!»? Forsa che tes geniturs u tia magistra han ditg quai, cura che ti has fatg da quai ch'ins na duess betg far ... Per exempel cura che ti has fatg da clown! Ils 27 da mars has ti ina buna stgisa per far teater co che ti vuls. Ti pos dir: «Bain, oz fatsch jau teater! Ils 27 da mars è numnadain il Di mundial dal teater.» Quest di mundial datti dapi il 1961, dapi che l'institut da teater internaziunal ha proclamà el. Manegià cun teater è qua il giu da rollas, damai persunas che gogan autras persunas per raquintar in'istorgia sin in palc. Questa furma da divertiment datti già dapi millis onns. Ils vegls Grecs han già giugà cumedias e tragedias.

Cumedias èn tocs divertents, tragedias percunter èn istorgias tristas che fineschan mal. Ils acturs purtavan mascras per giugar las differentas rollas.


In dals pli famus auturs da teater è stà il scriptur englais William Shakespeare. El ha per exempel scrit il teater «Romeo e Giulietta», l'istorgia da dus inamurads che na dastgan betg vegnir ensemen, perquai che lur famiglias han dispita ina cun l'otra. Shakespeare ha scrit il toc avant pli che 400 onns ed il tema sco er il teater sco tal èn anc adina actuals. Teater para damai da fascinar ils umans, tuttina cura e nua sin quest mund.

**Has ti già guardà ina giada in teater?**

**Datti ils 27 da mars in teater per uffants en tia regiun? Tschertga en l'internet e va a guardar el!**

**Tge teaters has ti gugent? Teaters cun poppas, cun mascras u cun dretgas persunas?**

**Fas ti tezza/tez gugent teater?**





# Faschain teater!

1

## Applaus


La grupp d'uffants sesa giun plaun e guarda vers la porta u vers la tenda. In uffant entra u vegn davant la tenda. Ella u el entra tut normal, cun in nas cotschen u cun ina mascra. La grupp d'uffants (il public) fa applaus. Suenter ch'ils uffants han applaudì, fa l'uffant ina reverenza/in enclin e sesa sper ils auters uffants. In auter uffant entra cun u senza requisit e la grupp applaudescha. Uschia vai vinavant, enfin che mintg'uffant ha pudì giudair l'applaus e far in enclin.



## Pantomima

In uffant tschern in animal u ina chaussa e preschenta la rolla tschernida senza discurren u far ramurs. Ils auters ston en-giavinar tge ch'è manegià. Era pussaivel: far pantomimas da mastergns.





### Rudè d'emoziuns

La grupp stat en in rudè. In uffant dat enturn in'emoziun. Mintg'uffant dat vinavant quell'emoziun a la vischina u al vischin. Uschia vai ina giada enturn, enfin che l'emoziun arriva puspè tar l'uffant che ha cumenzà. Ussa vegn il proxim uffant londervi. Variantas per mussar l'emoziun: in'exclamaziun, mussar l'emoziun mo cun la mimica, cun moviments, sco ils animals, liun = curaschus, chaun = cuntent, cot = losch, mieur = timida, etc.

### Leger la gasetta


In uffant stat d'ina vart da la stanza, cun il dies envers la grupp, e legia la gasetta. Il rest da la grupp è da l'autra vart da la stanza e tschern in'emoziun (u in animal). En quell'emoziun cumenzan els ussa a sa muventar plaun vers l'uffant che legia la gasetta. Quel sa volva e la grupp stat airi immediat (freeze). Sche l'uffant da la gasetta engiavina da tge emoziun ch'i sa tracta, vegn midà rolla, uschiglio legia el anc ina giada la gasetta e la grupp s'avischina puspè.


## Tgi sun jau?

Or dad ina chista cun vestgadira, requisits e mascras per sa travestgir prenda in uffant trais chaussas e las tira en. Ella u el sa preschenta davant la gruppa d'uffants e gioga ina persuna u in animal ubain ina figura or dad in'istorgia u in film. Ils uffants ston engiavinar la rolla da l'uffant. Tgi che engiavina endretg, dastga sa travestgir sco proxima u proxim.

## Mascras

Zambregiai mascras da differents animals or da plats da chartun e giugai co che quests animals festive-schan ensemen.





### En il restaurant

Giugai ina scena en il restaurant. In uffant è il giast, in auter serva, in terz è il cuschinier u la cuschiniera u insatge auter. Inventai anc dapli rollas e giugai las differentas variantas:

- Il giast empota spaghettis, ma survegn in pesch ...
- La cuschiniera ha in'assistenta u in assistent che metta sal empè da zutger en la crema da vaniglia ...
- La camariera mangia sezza nov chicken nuggets ed il giast survegn mo pli in chicken nugget ...
- Inventai atgnas scenas!